

## ԿԱՐԾԻՔ

### ««Սնանկության մասին» ՀՀ օրենքում փոփոխություններ և լրացումներ կատարելու մասին», «ՀՀ քրեական օրենսգրքում փոփոխություն կատարելու մասին», ««Անհատ ձեռնարկատիրոջ մասին» ՀՀ օրենքում լրացում կատարելու մասին» ՀՀ օրենքների նախագծերի վերաբերյալ

««Սնանկության մասին» ՀՀ օրենքում փոփոխություններ և լրացումներ կատարելու մասին», «ՀՀ քրեական օրենսգրքում փոփոխություն կատարելու մասին», ««Անհատ ձեռնարկատիրոջ մասին» ՀՀ օրենքում լրացում կատարելու մասին» ՀՀ օրենքների նախագծերի վերաբերյալ նկատառումները ներկայացվում են ստորև.

1. ««Սնանկության մասին» ՀՀ օրենքում փոփոխություններ և լրացումներ կատարելու մասին» ՀՀ օրենքի նախագծի<sup>1</sup> 8-րդ հոդվածով նախատեսվում է «Սնանկության մասին» ՀՀ օրենքի<sup>2</sup> 16-րդ հոդվածի 2-րդ մասի 1-ին նախադասությունը շարադրել հետևյալ խմբագրությամբ. «Հարկադրված սնանկության վերաբերյալ դիմումը վարույթ ընդունելուց հետո՝ 15 օրվա ընթացքում, դատավորը նշանակում է դատական նիստ, որին հրավիրվում են պարտապանը և դիմումում նշված պարտատերերը:»:

Հարկ է նշել, որ Օրենքի 16-րդ հոդվածը վերնագրված է «Սնանկ ճանաչելը կամավոր սնանկության դիմումի հիման վրա», ինչից բխում է, որ տվյալ հոդվածի կարգավորումներն առնչվում են կամավոր սնանկության հարցերին, մինչդեռ խմբագրված հոդվածի 2-րդ մասի 1-ին նախադասությունը վերաբերում է հարկադրված սնանկությանը:

Ելնելով վերոգրյալից՝ առաջարկում ենք Նախագծում կատարել համապատասխան փոփոխություն:

2. Նախագծի 17-րդ հոդվածը նախատեսում է Օրենքը լրացնել. «Կառավարչի լիազորությունները դադարեցնելը» վերտառությամբ 29.2 հոդվածով, որի 3-րդ մասի համաձայն 29.2 հոդվածի 1-ին մասի 6-8-րդ կետերով նախատեսված դեպքերում կառավարչի լիազորությունները դադարեցվում են համապատասխան դատական ակտի օրինական ուժի մեջ մտնելու օրվանից:

Մինչդեռ, 29.2 հոդվածի 1-ին մասի 8-րդ կետը վերաբերում է կառավարչի լիազորությունների դադարեցմանը կառավարչի՝ օրենքով սահմանված պարտականությունների կոպիտ կամ պարբերական խախտումների հիմքով: Ընդ որում, նշված հոդվածի համաձայն՝ 8-րդ կետով սահմանված հիմքով կառավարչի

---

<sup>1</sup> Այսուհետ՝ Նախագիծ

<sup>2</sup> Այսուհետ՝ Օրենք

լիազորությունները դադարեցվում են սնանկության կառավարիչների ինքնակարգավորվող կազմակերպության դիտորդ խորհրդի որոշմամբ, այլ ոչ թե դատական կարգով:

Ելնելով վերոգրյալից՝ առաջարկում ենք Նախագծի 29.2 հոդվածի 3-րդ մասից հանել 29.2 հոդվածի 1-ին մասի 8-րդ կետին կատարված հղումը:

**ՀՀ մարդու իրավունքների պաշտպանի աշխատակազմ**